

HEADLINES (EVENING)

1. MPCC President Pu Lal Thanhawla chuan Sorkar hnathawk tha te leh ram hotute remhriatna avangin tun sorkar chu a tha a ni tih loh theih lohna fiahna an nei a ti.
2. Mizoram Pradesh BJP President Pu JV Hluna'n India ramah Tualto Party-te chu an awngrawp telh telh tawh a, dinchhuahna tura innghhahna an nei tawh lo a ti.
3. Champhai Police in Khankawn Check Gate-ah cheng nuai 20 chuang hu Heroin an man.
4. Prime Minister Narendra Modi chuan vawiin khan New Delhi-ah India tlawha cham mek Canada Prime Minister Justin Trudeau a kawm.

<><><>

CM:

MPCC President Pu Lal Thanhawla chuan Sorkar hnathawk tha te leh ram hotute remhriatna avangin tun sorkar chu a tha a ni tih loh theih lohna fiahna an nei a ti.

Pu Lal Thanhawla hian vawiin khan Congress Bhavan-a Political Sessionah he thu hi sawiin, sorkar tha tehna chu an mahni tih nilovin mithiam kalkhawm NITI Ayayog te leh India rama mithiam ten kawng hrang hrang an chhut atanga an tih a ni a ti a. Delhi-ah chawlhkar khat zet an cham chhungin mi pawimawh tak tak leh BJP hotute a titi puinaah pawh Mizoram a inthlanpui lo awm turah an chak leh ngei an ring fur niin a sawi a, sawrkarna an papek tawp a ni ber, a ti a. Sawrkar thangchak tehna (GDP) leh State-ah GDPS punna khaikhinin Central-ah zaa 7.6 a nih laiin Mizoram chu zaa 9.45 a ni a, sawrkar kumtharah phei chuan Mizoram thanna tur hi zaa 10 thleng tur a beisei a ni, a ti bawk.

Vawiin Political Session hi NLUP puala hun hman a ni a, he hunah hian NLUP chungchang sawitu Pu H.Liansailova chuan NLUP chu Congress sawrkar leh Chief Minister kaihruaina leh hmahlir atanga lo piang a ni a ti a. Remna leh Muanna thupuiah hmangin ataka chu thupui a hlenchhuah hnuah retheite khaichhuah duhna thilung avanga he NLUP hi lo piang a ni, a ti. NLUP chu eptu lamte'n sawisel thinin vote zawinna angin puh thin mahse, retheite hmangaihna avanga he policy hi duan a ni zawk a. Khawvel pawhin a ngaipawimawhin Food Security, Livelihood Security, Forest and Environment Security-te tel vekna programme a ni a. Khawvel pawmpui policy leh scheme tha a ni a, NLUP hi international-in party dang ten itsikin vote leina ang mai a an sawi hi a tak nen chuan inpersan tak a nih thu a sawi.

(CORR)

<><><>

AIZAWL DISHA MEETING:

Aizawl District Development Coordination & Monitoring Committee (DISHA) meeting vawiin khan Secretariat Conference Hall-ah Rajya Sabha MP Pu Ronald Sapa Tlau kaihruaia neih a ni.

Pu Ronald Sapa Tlau chuan kalkhawmte chu district tana hmasawna a awm theih nana hnathawktu pawimawh tak tak an nih thu sawiin ram hmasawna tura an chanvo an hriat reng a tul thu a sawi a. Khawvel kalphung danglam zelah department hrang hrang

tanrual a pawimawh telh telh thu sawiin thahnemngai taka hmalak a ngaih thu a sawi a ni.

Aizawl DC Pi A. Muthamma chuan kalkhawmte lawmna thu a sawi a. Aizawl District chu Open Defecation Free (ODF)-a puan a nih tawh thu sawiin Swachh Bharat Kosh atanga sum dawn hmangin inthiarna siam bakah thuamthat hna kalpui a nih thu a sawi a. English language zirna kawnga hmalaknate a tarlang bawk a ni.

Vawiin DISHA meeting hi kumina meeting vawikhatna a ni a. Meeting-a tarlan dan chuan Aizawl District-a MGNREGA kalpuinaah mi 105308 hnenah hnathawhna siam sak niin Sakawrdai Zone, Phullen RD Block leh Thingsulthliah Zone-ah inhlawhna ni 48 neih tawh a ni a, ni 42 inhlawhna a bak zawng Block-ah neih tawh a ni bawk. Integrated Child Development Scheme (ICDS)-ah hian cheng nuai 3375.30 dawn niin Aganwadi Centre sak nan te, Health Check-up leh Immunization atan te hman a ni. Swachh Bharat Mission (Gramin) hna kalpuina Aizawl District huamchhungah inthiarna hmun 5 leh Rural Sanitation Mart hmun 6-ah siam a ni. PMKSY-WDC/IWMP hnuai project kal lai 18 a awm mek bawk a. Watershed area tihzau nan te, tui dahkhawlna atan leh afforestation atan hnathawh a ni. Shyam Prasad Mukherji Rurban Mission (SPMRM)-ah hian Rurban Cluster Aibawk leh Thingsulthliah RD Block siam a ni a, SPMRM hnuai hnathawhah cheng nuai 230.41 hman a ni tawh a. IAY/PMAY-G hnuai hian Aizawl District huam chhungah in 34 sak a ni tawh bawk a ni.

(DIPR)

<><><>

BJP:

Mizoram Pradesh BJP President Pu JV Hluna'n India ramah Tualto Party-te chu an awngrawp telh telh tawh a, an tan dinchhuahna tura inngghahna an nei tawh lo tih vawiin khan BJP Office-a Political Session neih-ah a sawi.

Pu JV Hluna chuan BJP National President Amit Shah phei chuan Kum 2018 inthlan zawhah chuan Tualto Party chu an ral tawh mai ang ati hial tih a sawi a. Mizoram-ah pawh hetiang tur Party hi an awm teuh tawh tih sawiin, Congress President Pu Lal Thanhawla leh MNF President Pu Zoramthanga te chuan an theihna an hmang zo vek tawh a, Mizoram tana thil tha tih tur Pakhatmah hriat an nei tawh lo a ni a ti bawk.

He hunah hian MLA hlui Pu PP Thawla chuan Saiha District-a an hmalakna sawiin, nikum a MDF leh BJP te in chhunfin chuan rah tha tak a chhuah mek thu a sawi a. MDC bial 25 awm chu an tlawhchhuah vek tawh thu leh Unit 96 awmah Unit 63 din anih tawh thu a sawi a. Pu PP Thawla chuan MADC hi Congress kulhpui thin ani a, tunah erawh chuan BJP hi cheng 6 nise, Congress hi cheng 5, MNF chu cheng 3 ang velin mipuiin an hmu tawh a ti.

(PR)

<><><>

HEROIN:

Champhai Police in Khankawn Check Gate-ah Heroin Hawng 43 an man.

Champhai Police Khankawn Check Gate a duty-te chuan nimin chawhnu khan Bawng phur lirthei pakhat atangin Heroin Hawng 38 an man a. Heroin phurtu Driver Vanlaltawka kum 19 Champhai Vengthar chu man anih bakah ruihhlo phurhna lirthei pawh Police-ten an hreng zui nghal.

Champhai Police hotute hnen atanga thu dawn danin, Sahbawn Bawm a dah Heroin Hawng 38 hi Gram 450.8 a ni a, Tualchhung hralhna a chhutin cheng Nuai 19 man a ni a, Champhai atanga Aizawl kalpui tur Ran phurtu lirthei Driver thutna hnungah heng ruihhlo man takte hi hmuh a ni a. Driver Vanlaltawka hian ruihhlo neitu leh a phur tura chahtu a a puh C. Lallawmsanga Champhai Vengsang, Zuangtui Leitlahniam a cheng chu nizan khan Police ten an man nghal a.

C. Lallawmsanga leh Vanlaltawka-te hi ND & PS Act tlawh chhana thubuui siam sak annih bakah ruihhlo phurhna lirthei pawh thubuui siam niin, hren a ni bawk.

Nizan vek khan Champhai Khankawn Police Check Gate a duty-te chuan Heroin Hawng 5 Tualchhung hralhna a chhut a Cheng Nuai 2 Sing 5 man an man leh a. Heroin neitu a puh Lalremsangi D/o Lalnuntluanga Zohmun khua, Aizawl Zemabawka a cheng mek ni a insawi chu manin, Champhai Police Station-ah ND & PS Act tlawhchhanin thubuui siamsak a ni a. Vawiin khan District Court a hruai anih hnuah Champhai District Jail-ah dahluh a ni bawk.

<><><>

GENERIC DRUG STORE @ MAMIT:

Health & Family Welfare Minister Pu Lal Thanzara chuan Mamit District Hospital- ah Damdawi Man Tlawm Zawrhna Dawr (Generic Drug Store) Jan Aushadi Drug Store a hawng.

Pu Lal Thanzara chuan generic damdawi hman uarna kawngah doctor te chu a pawimawh ber anih thu sawiin mipui leh damlo ten doctor ah rinna an nghat nasa a, doctor ber ten an chawh lem loh chuan damlo tan damdawi hriat leh lei ngaihna a awm lova, chuvangin doctor te pawhin damlo dinhmun ngaituahin, a bik takin mi harsa zawk ten heng damdawi man tlawm te chawh turin kan ngen nawn duh cheu, a ti a. Ram changkang te pawhin generic damdawi an hman nasat thu tarlangin Medical Council of India (MCI) pawhin hemi kawngah hian hma an lak thu a sawi bawk.

Mamit District Hospital khum 100 a tih lenna tur project chu NEC in an pawttlai leh tih sawiin an bawhzui leh mek a ni, a ti.

Jan Aushadi Kendra hi vawiina hawn nen hian Mizoram 8 a awm ta a. Aizawl District bakah Lunglei leh Mamit District a awm tawh a. District Hospital zawng zawnga hawng turin ruahmanna kalpui mek a ni a. Jan Aushadi Kendra a damdawi zawrh te hi damdawi siamtu, sawrkar enkawl company-te inzawmkhawm Bureau of Pharma PSUs of India buaipui vek a ni.

(DIPR)

<><><>

OLA:

Vawiin khan Finance minister Pu Lalsawta chuan Mizo High school field, Zarkawt atangin Ola a in ziaklut taxi engemawzat a vai liam a,

Finance Minister Pu Lalsawta chuan, duh huna hman theih Ola Cab Aizawl chung leh Lengpuiah hman theih a a awm ta chu lawmawm a ti a, Aizawl mipuite tan mel lung pawimawh tak leh chhinchhiah tlak ani, a ti.

Pu LalSawta chuan Ola cab chu Aizawl smart city a kan siam theih nan a hmalakna kawng pakhat a ni, a ti a, Ola cab in a tum chu mipuite veivahna awlsam zawk siam sak te, khawpui chhunga lirthei in boruak thianghlimlo a pek chhuah tih tlem te, lirthei hman

man tlawm zawk siam te leh lirthei hmang tute tan a veivahna him zawk buatsaih sak a ni, a ti.

(DIPR)

<><><>

MANN KI BAAT

Prime Minister Narendra Modi-an radio programme Mann Ki Baat kaltilanga mipuite hnena thu a sawi chu tun Pathianni hian chawhma dar 11 ah tihchhuah a ni leh dawn a, Mizo Tawnga lehlinin a chhonzawm anga, pathian zan vek hian dar 8 ah tihchhuah nawn a ni leh ang.

(DESK)

<><><>

PRIME MINISTER NARENDRA MODI HOLDS DELEGATION-LEVEL TALKS WITH HIS CANADIAN COUNTERPART JUSTIN TRUDEAU

Prime Minister Narendra Modi chuan vawiin khan New Delhi-ah India tlawha cham mek Canada Prime Minister Justin Trudeau a kawm a. Thil pawimawh tam tak an sawi dun a, abikin ram pahnih thawhdunna ti zau tura hmalakte leh sumdawna leh energy lam tih hmasawna tur an sawi dun a ni. Vawiin vek khan India leh Canada te chuan thawhdunna thuthlung paruk an ziak a, heng zingah hian infiamna, zirna, science and technology lamte a tel a ni.

Prime Minister chuan thuchhuah siamin India chuan Canada nena thawhdunna awmze nei tak kalpui a duh tih a sawi a. Ram pahnihten firfiakte do tura an thawhdun a tul a ni a ti bawk. Firfiaka chetna ten ram himna a ti derthawng a, hemi do tur hian thawhho a ngai a ni a ti. Pu Modi chuan vansang lam thiamnaah pawh an thawhdun theih thu a sawi a. Canada PM nen an inbiaknaah hian zau taka engkim an sawidun thu a sawi. External Affairs Minister Sushma Swaraj pawhin Justin Trudeau hi a hmu bawk a. India leh Canada inkungkaihna hrang hrang an sawi dun a ni. Vawiin tlai khan Canada PM hian President Ram Nath Kovind a hmu bawk a ni.

(*Newsonair*)

<><><>